

Utoqqarnik paaqqinniffiit il.il. pillugit Inatsisartut peqqussutaat

Suliassaqtitsiniarnermik inunnillu isumaginninnermik Kalaallit Nunaannut inatsimmi nr. 580-imi 29. november 1978-imeersumi § 2 tunngavigalugu makku aalajangersarneqarput:

Kapitali 1

Utoqqarnik paaqqinniffinnut il.il. nuunnissami piumassaqaataasut nalinginnaasut

§ 1. Pensionisiallit namminneq angerlarsimaffimminniiginnarsinnaanngitsut kommunimi utoqqarnik paaqqinniffimmum nuunniallutik qinnuteqarsinnaapput.

Imm. 2. Pensionisiallit paaqqutarineqarnissamik sullinneqarnissamillu kommunip utoqqarnik paaqqinniffiani naammassineqarsinnaanngitsunikpisariaqartitsisut peqqinnissaqarfiup ataani paaqqinniffimmum nuukkumallutik qinnuteqarsinnaapput.

Imm. 3. Pensionisiallit kommunimi utoqqarnik paaqqinniffimmum peqqinnissaqarfulluunniit ataani paaqqinniffimmum nuukkallarnissaminnik qinnuteqarsinnaapput.

§ 2. Kommunip utoqqarnik paaqqinniffiutaanut peqqinnissaqarfulluunniit ataani paaqqinniffimmum nuunnissamik qinnuteqaat kommunimi najugarivitami kommunalbestyrelse-mut isumaginninnermi suliassanik ingerlatsisuusumut tunniunneqassaaq.

Imm. 2. Inuit kommunit aggornerisa avataani najugaqartut qinnuteqaataat Isumaginninnermi Pisortaqarfimmum ingerlatinneqartassapput, qinnuteqaallu kommunimut pensionisiallit nuuffigerusutaanut Pisortaqarfiup ingerlateqqittassallugu.

Imm. 3. Kommunip utoqqarnik paaqqinniffiutaani peqqinnissaqarfulluunniit ataani paaqqinniffimmi najugaqarallarnissamik qinnuteqaatit imm. 1-imi aamma imm. 2-imi aalajangersarneqartutut ingerlatinneqartassapput.

§ 3. Kommunip utoqqarnik paaqqinniffiutaanut peqqinnissaqarfulluunniit ataani paaqqinniffimmum nuunnissamik qinnuteqaatit nuuttussanik inissiiartarneq pillugu ataatsimiititaliamit oqartussanik assigiinngitsunit ilaasortaaffigineqartumit suliarineqartassapput.

Imm. 2. Kommunip utoqqarnik paaqqinniffiutaani peqqinnissaqarfulluunniit ataani paaqqinniffimmi najugaqarallarnissamik qinnuteqaatit imm. 1-imi aalajangersarneqartutut suliarineqartassapput.

Imm. 3. Naalakkersuisut nuuttussat pillugit ataatsimiititaliap ilaasortalersorneqarnissaanut sunillu oqartussaaffeqarnissaanut malittarisassat aalajangersassavaat. Malittarisassat taakku Kalaallit Nunaanni Kommuneqarfiit Kattuffiat suleqatigalugu suliarineqassapput.

§ 4. Oqartussaaffeqarfiup qinnuteqaammik Inatsisartut peqqussutaat manna tunngavigalugu suliarinnittuusup qinnuteqartoq suliassamik paasissutisseeqataanermut peqataaqqusinnaavaa.
Imm. 2. Oqartussaaffeqarfiup qinnuteqaammik Inatsisartut peqqussutaat manna tunngavigalugu suliarinnittuusup oqartussaaffeqarfiit allat suliassap suliarineqarnerani pisariaqartinneqartutut isigineqartunik paasissutissanik tunniusseqqusinnaavai.

Kapitali 2

Utoqqarnik paaqqinniffinnik il.il. pilersitsineq paaqqinniffinnilu najugaqarneq

§ 5. Kommunini utoqqarnik paaqqinniffinni inissat pisariaqartinneqartutut amerlassusillit pigineqarnissaat kommunalbestyrelsip qulakkiissavaa.

Imm. 2. Pensionisialinnut sammisassaqartitsinermik neqeroorutini inissat pisariaqartinneqartutut amerlassusillit pigineqarnissaat kommunalbestyrelsip qulakkiissavaa.

Imm. 3. Utoqqarnik paaqqinniffiit sammisassaqartitsinermillu neqeroorutit kommunimit pilersinneqarlutillu ingerlanneqassapput.

Imm. 4. Naalackersuisut utoqqarnik paaqqinniffiit pilersinneqarnissaannut, pisatsersorneqarnissaannut, siulersorneqarnissaannut ingerlanneqarnissaannullu malittarisassanik aalajangersaassapput, matumani utoqqarnut paaqqinniffinnut aammalu sammisassaqartitsinermik neqe-roorutinut akiliuteqartarnissamut malittarisassat ilanngullugit eqqarsaatigalugit.

§ 6. Peqqinnissaqarfiup ataani pensionisialinnut paaqqutarineqarnissamik immikkut pisariaqartitsisunut inissanik amerlassusilikkanik inissaqartitseqqullugu kommunalbestyrelsi peqqinnissaqarfimmut isumaqatigiissuteqarsinnaavoq.

Imm. 2. Peqqinnissaqarfik ulloq unnuarlu najugaqarnermi akiliutissamik imm.1 tunngavigalugu akileeqqusisassaaq. Akiliutissaq, utoqqarnik paaqqinniffiup ingerlatsinermut ukiumoortumik aningaasartuutai tunngavigalugit naatsorsorneqartartussaaq, ukioq ataaseq atuuttussanngorlugu aalajangersarneqartassaaq. Akiliutissaq Naalackersuisut aamma Kalaallit Nunaanni Kommuneqarfiit Kattuffiata akornanni isumaqatigiissuteqarnikkut aalajangersarneqartassaaq.

Kapitali 3

Naammagittaalliuuteqarsinnaaneq

§ 7. Kommunilbestyrelsip aamma Isumaginninnermut Pisortaqarfiup aalajangigaat isumaginninnermut tunngasut siulersorneqarnerat aqqissuunneqarnerallu pillugit Inatsisartut peqqussutaanni aalajangersakkat malillugit naammagittaalliuutigineqarsinnaapput.

Kapitali 4

Aningaasalersuineq

§ 8. Kommunini utoqqarnik paaqqinniffiit il.il. sanaartorneqarnerannut ingerlanneqarnerannullu aningaasartuutit kommuninit ataasiakkaanit akilerneqartassapput. Naatsorsuutini

saqqummiussisarnermut kukkuneruiunermullu malittarisassat Naalakkersuisut aalajangersartassavaat.

§ 9. Kommunini utoqqarnik paaqqinniffinnik il.il. sanaartornermut Landskarsi tapiissuteqarsinnaavoq.

Kapitali 5

Misileraaneq pillugu aalajangersakkat

§ 10. Kommunini utoqqarnik paaqqinniffiit il.il. pillugit misileraammik aaqqissuussinernut malittarisassanik Naalakkersuisut peqqussut manna tungavigalugu aalajangersaasinnaapput.

Imm. 2. Kommunikkaartumik misileraalluni aaqqissuussineq sivisunerpaamik ukiuni pingasuni atuussinnaavoq.

Imm. 3. Kommunikkaartumik misileraalluni aaqqissuussinermi angusarineqartut nassuiaasiornikkut tamanut saqqummiunneqartassapput.

§ 11. Misileraalluni aaqqissuussinerit kommunit aggornerisa avataanniittunut atuuttut § 10-mi aalajangersarneqartut itut pillugit malittarisassat Naalakkersuisut aalajangersarsinnaavaat.

Kapitali 6

Atortuulersitsineq

§ 12. Inatsisartut peqqussutaat manna 1. marts 1999 aallarnerfigalugu atortuulersinneqarpoq.

Imm. 2. Tamatumunnga peqatigitillugu isumaginninnikkut pensionit utoqqarnillu paaqqinniffiit il.il. pillugit Inatsisartut peqqussutaanni nr. 8-mi 22. oktober 1990-imeersumi kommunini utoqqarnik paaqqinniffiit il.il. pillugit aalajangersakkat atorunnaarsinneqarput.

Imm. 3. Utoqqarnik paaqqinniffiit il.il. pillugit aalajangersakkat pensionit utoqqarnillu paaqqinniffiit il.il. pillugit Inatsisartut peqqussutaat nr. 8, 22. oktober 1990-imeersoq tungavigalugu aalajangersarneqarsimasut atuutiinnassapput inatsisartut peqqussutaat manna allalluunniit tungavigalugit taarserneqarnissamik atorunnaarsinneqarnissamilluunniit tungaanut.

Namminersornerullutik Oqartussat, ulloq 30. oktober 1998

Jonathan Motzfeldt

/

Mikael Petersen

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut